

वंदना




प्रेम नाथ 'शाद'

वंदना

A Collection of Kashmiri Bhajans
(Second Edition)

काँशिर भजन स्वम्बरन
(दोयिम अडिशन)



प्रेम नाथ 'शाद'

वंदना
(सॉरी हकूक विनोद बट्ट नि नाव)

किताबि हुंद नाव	:	‘वंदना’
लेखक	:	प्रेम नाथ ‘शाद’
जा जाय	:	काज़ी बाग, बडगाम, कश्मीर।
ग्वड छाप	:	2002 ई
दायिम छाप	:	2006 ई
तेदाद	:	300
म्वल	:	Rs. 60/-
कम्प्यूटर डी.टी.पी	:	रिंकू कौल 9419136369 IILS D.T.P CENTRE, Muthi, Jammu.
देवनागरी लिपि अंत्रन	:	पी.एन. ‘शाद’
प्रेस	:	जे.के.आफसेट, दिल्ली।

मेलनुक पता :

1. वीर हावुस सरवाल जोम।
2. विजेश्वर धार्मिक पुस्तक भंडार, तालाब तिलू, जोम।
3. ज्योतष कार्यालय, चिनोर चोक, रूपनगर, जाम।
4. विनोद बट्ट, 39/3, आर्दष कालोनी, उधमपुर।

01992-273335, 94192-41102

शीना पबलिकेशंज़, उधमपुर, जाम

वंदना

अर्पण

**पनुनिस मॉलिस माजि
समर्पित**

लीलायि हुंद सँतीसर

प्रेमनाथ 'शाद' साँबुन्य ताजु लीला स्वम्बरन 'वंदना' (दोयिम ऐडिशन) वाँच बाज़रस मंज़। लीला छे व्वन्दुकिस सँती सरस मंज़ जायुन लबान तु हुसुनकाँरी हुंदिस नागुरादस नखु तसँवुरातन हुंदिस समसारस वलनु यिवान। 'शाद' सुंजु यिमु लीलायि पँरिथ छे रूहस तरावथ फेरान।

बासान छु ज़ि अँम्य सुंद पूज़ि दिवता छु साँईबाबा यि छु अँम्य सुंदिस जलवस पोंपुर्य सुंद्य पाँठ्य गतुग्यूर करान तु वनानः

द्वख हर कर व्वपुकार, आवलैनि लगिहे तार।

बखशुम साँरी खता, ही गोरू साँई बाबा॥

बर तल छुस शरमसार, चोन अनुग्रेह छुम बकार।

छुस हलम दाँरिथ गदा, ही गोरू साँई बाबा॥

'शाद' छु लफज़न म्वछि मंज़ रँटिथ काँर्यगँरी सान लूबुवुन्य तु शूबुवुन्य नकुश गरान। यि छु लफज़न हुंजु मूरँच गँरिथ अख त्युथ समसार डेशमान अनान येमि किस नबस पनुन अलगुय जून तु अफताबु छु गथ करान।

यि छु ज़गत अम्बायि व्यनथ करान तु अँकिस खानु माँल्य शुर्य सुंद्य पाँठ्य शिकवु ति करानः

द्वद कंद नाबद बावु बावय,

आंगनस मंज़गाब डेरु त्रावय।

आँरत्यन डेरु डेरु फेरि माँजी,

व्यनु पोश लागय शेरि माँजी॥

यि छु जँदीद ह्येसु आगही हुंद तिलसुम ज्ञानान।

तवय छु अँहुँदि दिलुक ज़महँरीर अँमिस होशमँदी तु अँहतिरामुक्य तंग जामु पुचरिथ वनुनावान :

अख कदम अज़ न्यबर नेरि माँजी।

व्यनु पोश लागय शेरि माँजी॥

यि छु माँजिभवानि अख शिकवु करान तु वनान। चु फेर तु सान्यन शर्नार्थी डेरन तु वुछतु सोन हाल। अँम्य सुंदिस कलामस म्यूल लूकन हुंद दाद। अँम्य सुंद कलाम बूज़िथ छि अँछ बरबुकु यिवान।

'शादस' छुनु सरनामु लेखनुक कांह ज़रूरत बँल्यकि छु यि काँशरि अदबुक पानय सरनामु। अँम्य सुंजु ग्वडुनिच लीला स्वम्बरन 'वंदना' कँर लूकव यीच पसंद ज़ि वुछान वुछान म्वकल्योव अथ ग्वडुन्युक अडिशन। दूरदर्शन श्रीनगरन तु रेडियो कश्मीरन करि यिमु लीलायि सदाबंद तु बाज़रस मंज़ छि यिम केसेट तु सी.डी आम मेलान।

अँमिस छु शारुक प्रथ genere लेखनस मंजु यदितूला हॉसिल। गजल, नजुम, वाख तु मरसिया, लीला, नात, शुर्य बॉथ, वचन, मज्जाहिया बॉथ तु चुमिसरॉय लेखनस मंजु छु अँमिस अलग मकाम हॉसिल।

अँम्युं सुंजु लीला स्वम्बरन 'वंदना' (दोयिम एडिशन) वॉच बाजर। मे छि व्वमेद जि अँदीब, तनकीद निगार तु भक्तिजन करन अथ किताबि अँछन मंजु जाय। तिक्याजि व्वन्दु असरारन हुंद गँजीनु छु दरवाजु मुचरिथ। बकोलि शॉयिर : वौल्यवु आशको चैयवु टूरि टूरे।

अथ कलामस छु शेरी एजाज हॉसिल तु यि किताब छि अमिस मँछ्यलिस तु लोल हँतिस ग्वनमात सुंजु अख कामयाब कूशिश।

मोहनलाल 'आश'
दुर्गानगर, जोम।

बावनायि बोग

यथ असार समसारस सार छांडुन छुनु नेठ्य ओंगजि गँजरुन बँल्यकि छु खूनि जिगर चॉग्यन ज़ालुन तु अँथ्यु गाशस सुत्यु, आशि हुंजु ऑडरन कँरिथ लयि तु क्रयि हुंद्य जामु पॉराविथ मँज्यलस कुन पकुन। इनसान छु ज्यनु प्यठु मरनस ताम अख अबदी जिंदगी जुवान। जिंदु रोजनु खॉतर छु आशन हुंद डोख आसुन ज़ोरूरी मगर आशि छे बजाति ख्वद ति तॉबीन आसान अँकिस खास सोच व फिकरस तु माहोलस। यछु खसि तेली रथि येलि पछि हुंद बितुर ओर तु दोर आसि। यिहय पछु छे श्रद्धा तु विशवास। यि श्रद्धा तु विशवास छे अँकिस अमलि तरतीब दिवान। यि अमल गँयि बँखती तु अथ बँखती शेरुपॉर करनु बापथ छु लोल तु माय आसुन लॉजमी। दौग्यन्यार, दुय तु हसद छु अशकु अलावस मंजु ज़ालुन प्यवान। येलि अँशकु मनकलि हुंजु तमाजत अँकिस खास हदस ताम वातान छे, श्रद्धायि तु बँखती हुंजु ऑडरन छे शब्दन हुंजु सूरत यखतियार करान तु अँकिस मखसूस निजामस तहत अख मखसूस शकुल तु सूरत प्रॉविथ आम लूकन ताम वातान। यिमव मुखतलिफ

सूरतव मंजु छे अख सूरत लीला ति।

यि कथ छेनु टारि खसुन्य लायख जि अख लीला शॉयिर गछि दरवेश या साद आसुन। लीला शॉयरी हुंदिस सफरस मंजु यिम तजरुबु या ह्येसु आगही आसुन्य गछि तमि बापथ छुनु वनवास गछुन या सँन्ययास ह्योन कांह ति शरुत। व्वन्य गव शॉयरी हुंद्यव लवाँज्यमातव निशि बाखबर आसुन छु लीलायि शूबिदार वर्दन लागनु बापथ अख अहम न्वकतु। येलि कल गनन छि तु शख तनन छि। लीला शॉयरस छे कसरँतस मंजु वहदत द्रेंठमान सप्दान। यि हालथ छे असि 'शाद' सॉबनि 'वंदना' किताबि मंजु जायि जायि नजरि गछान, वनान छु:

क्रयि हुंद मस चोम ह्यस ज़न फ्यूरुम तसकुन दोरुम ध्यान। प्रेयुमुचि वखुनयि कन मे थोवुम रँछरोवुम वेशवास॥

वेशवास रँछरावनु बापथ छे प्रेयमुचि रजि द्वयव अथव थफ प्यवान करुन्य तु क्रयि हुंद मस च्यथ ह्येसु प्यवान रोजुन। अमि बापथ छे ग्वरु संज रहबरी ज़ोरूरी तिक्क्याजि येलि बँखती ग्वरु कृपायि रंग खसि तेलि चलि मनस मल तु त्रष्णायन लागि ठाख। 'शाद' सॉब छु ग्वरु असतोती सुत्य सुत्य भगवान राम, श्री कृष्ण, माता रॉग्यन्या, जगतमातायि हुंज असतोती ति करान तु दीवी आरादनायि सुत्य सुत्य साँई दरबारस मंजु हॉज़िर गँछिथ श्वदि मनु साँई रामस लोल बरान

तु ख्वनि ललवान।

येलि 'शाद' रामजियस आराधना करान छु तमि वकतु छु अकि अटल वेशवासुक इज़हार करान। वनान छु: मुह नैदरे मंजु वुजनाव्यम कर्महीनस कास्यम शाफ। दियि म्वकजार वासनायि बावस रामुनावस आलुवस पान॥

लीला व्यनथ तु आराधना ब्योन ब्योन चारुन्य तु अथ दल द्युन छुनु यैत्यन मुमकिन ताहम छे यिमु सारे शारु जॉच 'वंदनायि' मंजु नजरि गछान। 'शाद' छु भगवान शिवस व्यनथ करान तु वनान :

दकुजद आसय लारान लारान,
वतु चानि छारान गोम यैचकाल।
वनि यितु लोसम मनि प्रॉर्य प्रॉरी,
शंकरु बोजु म्यॉन्य जॉरीये॥

मोजून तु प्रेयिवुन्य लफुज इस्तिमाल कॅरिथ लीला पॉरावुन्य छे फनकॉरी। य्वसु अकि ज़ेठि तजरुबु पतु हॉसिल छि गछान। वुछतव :

वथ म्वकजारुच वनि यियि पानय,
सनि येलि जिगरस पोजु बँखति बाव।
ज्ञान करनावी ज्ञान अनजानस,
सर्वु शक्तिमानस जय जय कार॥

अख शॉयिर छु समाजस, माहोलस तु जमानस सुत्य यिथु पॉठ्य जूरिथ आसान यिथु पॉठ्य इनसानस सुत्य पनुन्य छाय छि। अख शॉयिर हैकि नु अमि

निशि फरार तु म्वकजार लंबिथ। अवय छु 'शाद'
मातायि व्यस्तापनुक क्रेछर न सिरिफ बावनायि सूत्य
बॅल्यकि अकि तवका सूत्य वनान :

असे सॅर्य पैठ्य छु व्वन्य सॅहलाब गोमुत,
सहायक कुस चै रौस ज़ानोन असि वन।
तुफानस मंज़ छि नमु रौस नाव यीरान,
वथा हाव युथ बॅठिस लागोन असि वन॥

'शाद' छुनु हैमथ हारान तु नु छु ना व्वमेद गछान।
बॅल्यकि छु पछि हुंद दामन चीरु रॅटिथ थदि हटि वनान:

छॅकरुनु आमृत्य् तरफातन,
छॉडि तु स्वम्बरावि मॉज छेना।
बालु पॅत्य् आरुकॅत्य् गारान छिस,
आलुवन कन थावि मॉज छेना॥

'शाद' सॉबस छेनु ज़ेनुजाय मॅशिथ गछान। गछेस ति
किथु पॉठ्य् रगन रगन मंज़ छुस काँशुर खून ग्रख
दिवान तु वनान छु :

वनवॉस्य् सफरस हेनु छी आमृत्य,
छेनु छय गॉमुच असि ज़ेनु जाय।
सरि राह परुछेन्त्य् गरि यनु द्राये,
बजि आशाये आये योर॥

'वंदना' पॅरिथ छु येमि कथि हुंद ऐहसास गनान ज़ि
'शाद' छु येछि पछि तु बावनायि सान लीलायि
लेखान तु आयंदु ति रोज़ि परन वाल्यन रंज़ुनावान।

जगन नाथ 'सागर'

आदि दीवस व्यनती

बॅखृत्य चोनुय वछस मंज़ भाव चोनुय!
शहन मंज़ आदि दीवा नाव चोनुय!!

सैदी कारन करान छय चॉन्य शखती!
क्षमा पापन दया दॅर्ययाव चोनुय!!

मनस अन्दर सजॉवुम जाय चॉनी!
वुछान वतु छुस यि छुम आव आव चोनुय!!

चु छुख आधार ज़गतुक तारु तारान!
करुम सथ छुम दिलस चिकु चाव चोनुय!!

चु छुख गौरी पोथुर बब छुय दिगमबर!
चु ऑरी छुख मॅछ्युल वरताव चोनुय!!

बु लुगुँहय पॉर्य पॉरी च़रनु कमलन!
मनस मूहित करान पॉराव चोनुय!!

दिवान छुख परमु मंगल बे सहारन!
श्रदालू "शाद" छुय छुस बाव चोनुय!!

वंदना
गणेश असतुती

आदि दीवु आसय गनपतयॉरी,
शर्णागतसुय जॉरी बोज़ !
मन छुम चन्चल ओश छुम जॉरी,
शर्णागतसुय जॉरी बोज़ !!

दुशकर्मन हुंद नॅख्य् छुम बार,
चेय रोस कांह छु नु बखशनहार !
दासस न्यवारुम पापुन्य बॉरी,
शर्णागतसुय जॉरी बोज़ !!

बरु तल चाने त्रोवुम सर,
न छु कांह यारुंय न छु यावर !
आँदीन आसय गजु म्वखु धॉरी,
शर्णागतसुय जॉरी बोज़ !!

येछि पोश लागय छलु हय पाद,
हाजथ छुम चोन आँशिर्वाद !
अथु रौट करतम छुख व्वपुकाँरी,
शर्णागतसुय जॉरी बोज़ !!

आँरचर बोज़तम दिम वरदान,
बाव छुम, दोरुम चोनुय ध्यान !
नखु डखु रोज़तम छम लाचॉरी,
शर्णागतसुय जॉरी बोज़ !!

वंदना

रूप चोन तीज़ चोन सिर्ययि प्रकाश,
कस आसि वर्णन करनुक बाश !
बन्द दरवाज़न मुचराव तॉरी,
शर्णागतसुय जॉरी बोज़ !!

बेकस 'शादस' चाँनी आश,
अनिगटि मंज़ छुस हावतम गाश !
ग्वन चाँन्य ग्यवुनस दिम अनवाँरी,
शर्णागतसुय जॉरी बोज़ !!

ग्वरु अस्तोति

सुबहन सुबहॉय मन वुज़नोवुम, रँछरोवुम वेशवास।
ग्वरु चरनन तल मस्तक त्रोवुम, रँछरोवुम वेशवास॥

अनिगटि रातस लुयि त्रोपुराँविथ, ब्रमुकुय सपदुम बास।
दम दिथ सखर्योस रख बदलोवुम, रँछरोवुम वेशवास॥

मोदरेन शब्दन अम्रेतु वाँनी, सत ग्यान चेथ आनंद।
अँदुरेव अँछवुय व्वंदु तस बोवुम, रँछरोवुम वेशवास॥

क्रयि हुंद मस चोम ह्यस ज़न फ्यूरुम, तसकुन दोरुम ध्यान।
प्रँयमुचि वखनयि कन मे थोवुम, रँछरोवुम वेशवास॥

वंदना

वैन्य् दिनि ब्यूठुस खानस—खानस, कुनि कॅह वनि मा आम।
ग्वरु नावु सुमरॅनि साकार होवुम, रॅछरोवुम वेशवास ॥

खयि लद बानस मल ज़न छोलनम, मोलनम बॅक्ती रंग।
त्रशनायि दोदमुत देह शेहलोवुम, रॅछरोवुम वेशवास ॥

मरि मँजु नीरिथ धरमुचि लरि चास, गरिकुय सपदुम बास।
सनम्बख सॉमी सँग यैलि प्रोवुम, रॅछरोवुम वेशवास ॥

सत ग्वरु व्वडि प्यठ अथु थव 'शादस', अथि मा आव ल्वकचार।
फंदु गोम नीरिथ चंदुकुय रोवुम, रॅछरोवुम वेशवास ॥

राम लीला

दियि दर्शुन ती छुम हावस,

रामु नावस आलुवस पान।

वुछि म्यॉनिस बक्ते बावस ॥

रामु नावस आलुवस पान ॥० ॥

मुहु नैदरे मंजु वुज़नाव्यम,

करमु हीनस कास्यम शाफ।

दियि म्वकृजार वासनायि वावस ॥

रामु नावस आलुवस पान ॥० ॥

वंदना

सत शबदन ज़ान करुनाव्यम,
न्यथ करुहस पोशि पूज़ा।

अनज़ान छुस लौगमुत दावस ॥

रामु नावस आलुवस पान ॥० ॥

समसारस ब्रम बॉज्यगारस,

कुनि तारस छुनु व्यस्तार।

शरनागत पान पुशरावस ॥

रामु नावस आलुवस पान ॥० ॥

मनु मंदरस आसन शेरस,

अशिवाने छलहस पाद।

नेथुर द्वशवय वति वथरावस ॥

रामु नावस आलुवस पान ॥० ॥

सर्वुव्यॉपी सर्वुशक्तिमानस,

बगवानस करु ज़ारुपार।

पोश फ्वलनम नारु अलावस ॥

रामु नावस आलुवस पान ॥० ॥

'शाद' आमुत छुस हलम दौरिथ,

कष्ट कास्यम छुम दयावान।

बावु लीला पानु पिलुनावस ॥

रामु नावस आलुवस पान ॥० ॥

वंदना
राम लीला

राम रगुनंदन आनंद नाव,
शनीगत आय दर्शुन हाव।

चरनु अमर्यतुकुय दामाह चाव॥

शनीगत आय दर्शुन हाव।

ग्रज खोत गगनस जय जय कार,
जगतस बागि आव मूलादार।
व्वन्दु वुजुनोवुय बॅखते बाव॥
शनीगत आय दर्शुन हाव।

सतुकी सिर्ययन परतव त्रोव,

चैतुकी थानन वैस्तार प्रोव।

गटि गव र्वखसत गाशुल आव॥

शनीगत आय दर्शुन हाव॥०॥

दशरथ राजुनि चमनुक पोश,
माता क्वशॅल्यायि मनु संतोश।
सीता स्वयम्वर बल परखाव॥
शनीगत आय दर्शुन हाव॥०॥

आज्ञापालक प्रॅयमुक सार,

अजोध्यायि हुंद राजु कुमार।

च्वदहन वॅर्ययन वनवास द्राव॥

शनीगत आय दर्शुन हाव॥०॥

वंदना

त्यागुक महिमा पलि पोवुथ,

सेवा सादना सीर बोवुथ।

दर्मस ध्यानस ज्ञानुक छाव॥

शनीगत आय दर्शुन हाव॥०॥

आदर्शन करनोवुथ ज्ञान,

क्याह गव आदर क्या बलिदान।

सिंगासन खॉर भरतन खाव॥

शनीगत आय दर्शुन हाव॥०॥

हनुमानन कोर पादि प्रणाम,

वछि मंजु होवुन सीता राम।

श्रद्धा सुमरन निशकाम बाव॥

शनीगत आय दर्शुन हाव॥०॥

‘शादस’ मल कास मनु शीशस,

अथु दॉरिथ छुय व्वपदीशस।

सत करमन हुंद रुत वरताव॥

शनीगत आय दर्शुन हाव॥०॥

शिव शंकर

वैष्णो बृह्मा अमरीश्वर, करता दरता शिव शंकर।
दीनु दयालू गंगादर, करता दरता शिव शंकर।

सु त्रशूलदोरी मूलादार, सुय भयहोरी बखशनहार।
ब्रशबस खँस्यथुय बसमादर, करता दरता शिव शंकर।

सुय सारि जगतुक पालनहार, तँस्य समहारुक छुय यखतियार।
सुय सर्वु व्यापी सुय ईशर, करता दरता शिव शंकर।

पूजा तँम्य सुंज बवुसरु तार, सोय गौयि मुक्ती सुय म्वकजार।
सुय द्वखु हरता स्वखु सागर, करता दरता शिव शंकर।

क्षण क्षण युस करि तँम्य सुंद ध्यान, श्वद्ध तस सपदन मन तय प्राण।
आरती बोजान पार्थीश्वर, करता दरता शिव शंकर।

‘शादस’ ओंमकार नजरन तल, शिवरूप शर्नागत वतसल।
पादि प्रणामस नोमरिथ सर, करता दरता शिव शंकर।

व्यनती

अँस्य आयि करने चोनुय ध्यान,
शिव शंकर कर असि कल्याण।
चैय पुशरोवुय बेकस पान॥

शिव शंकर कर असि कल्याण॥०॥

कांह छुनु फँर्ययाद बोजन वोल,
भगवानु संकट कोताह चोल।

छी हलम दोरिथ कर दयादान॥

शिव शंकर कर असि कल्याण॥०॥

मन गव दूशी तनि लोग ताव,
गंगायि अमर्यतु कर छिरकाव।

पानि रोस जांह छुनु दानि व्वपदान॥

शिव शंकर कर असि कल्याण॥०॥

लारान आमृत्यु छि चर्णन तल,
चुय छुख शर्णागतु वतसल।

पाप बखशान छुख शाफ कासान॥

शिव शंकर कर असि कल्याण॥०॥

मतु गछतु सॉन्यन कर्मन कुन,
अंजान जाँनिथ गछि बखशुन।

कलु नोमरॉविथ छिय पशेमान॥

शिव शंकर कर असि कल्याण॥०॥

बंदना

दिवताहन हुंद छुख दिवता,
छी पथर पेमुत्य कर सहायता।
गट्ट कास रोट असि चोन दामान॥
शिव शंकर कर असि कल्याण॥०॥

पेट्य पैयि राथ व्वन्य फॅलुराव गाश,
सतचे वति दितु पकनुक बाश।
मूर्ख दासन दि पूर्ण ग्यान॥

शिव शंकर कर असि कल्याण॥०॥
दयि नाव स्वरनुच मा कॅर कल,
रावुरोव पनुनुय आत्मबल।
चन्यचल मन छुनु डंजि रोजान॥
शिव शंकर कर असि कल्याण॥०॥

येछि पछि 'शादुन' बोज़ ज़ारुपार,
लीला छि चॉनी अपरमपार।
श्वद बावनायि छुय पाद पूज़ान॥

शिव शंकर कर असि कल्याण॥०॥

बंदना

ज्ञान कर

खय कास लय कर सुत्य् भगवानस,
सर्वु शक्ति मानस जय जय कार।
दयि नाव विमर्श आनस आनस,
सर्वु शक्ति मानस जय जय कार॥
बंदगी तॅम्य् सुंज तारस तारी,
चन्दु बाँदव छी अंग आँशनाव।
ज्ञान कर पान पुशराव जानानस,
सर्वु शक्ति मानस जय जय कार॥

ठॅर्य् सुय कासी प्रख्टुय बासी,
तन फ्वलि अदु चलि मनुकुय मल।
महिमा प्रावख श्रानस ध्यानस,
सर्वु शक्ति मानस जय जय कार॥

वथ म्वकुजारुच वनि यियिपानय,
सनि येलि जिगरस पोज़ भक्ति भाव।
ग्यान करनावी ज्ञान अनज्ञानस,
सर्वु शक्ति मानस जय जय कार॥

कल कर मॅशराव छल समसारुक्य,
अदु छैवरावख नरकुन नार।
प्रेयमुक मॉर्यफत बर पयमानस,
सर्वु शक्ति मानस जय जय कार॥

वंदना

कृपायि सागरु तन मन नावुन,
मुह ज़ालु म्वकलाव पनुनुय पान।
कोसम फौल्य फौल्य यिन वॉरानस,
सर्वु शक्ति मानस जय जय कार॥

शर्मन्दु 'शाद' छुस चेर छुम गोमुत,
सुलि मा पायस प्योमुत छुस।
व्यत्रावुन प्योम मूर्ख पानस,
सर्वु शक्ति मानस जय जय कार॥

भाव पोश

शक्ति नाथ शम्भू ज्ञानु स्वरूपय,
भक्ति भावु लागय शेरि पम्पोश।
छुस शरण आमुत बेकस अनाथय॥
भक्ति भावु लागय शेरि पम्पोश॥०॥
वासनायि मल प्योम रोवुम व्यचारय,
पतु ब्रोंठु बास्योम मुह अंधकार।
वन्दुना कया करु छुस अंजानय॥
भक्ति भावु लागय शेरि पम्पोश॥०॥
स्वखु शाँती हुन्ज दृश्टी त्रावतम,
म्वख चोन वुछनुक छुम अभिलाश।
द्वखु समसारन वौलनम ज़ालय॥
भक्ति भावु लागय शेरि पम्पोश॥०॥

वंदना

कष्ट दशा चलि अनुप्रेह चाने,
मेति बनि आनन्दु अनुभव चोन।
ज्ञानु प्रकाश करि हृदयस नावय॥
भक्ति भावु लागय शेरि पम्पोश॥०॥

हटि छुय वासुक जैटि गंगा छय,
तनि मृगु छाला अथि छुय त्रुशूल।
श्रदायि अमर्यथ चावतम दामय॥
भक्ति भावु लागय शेरि पम्पोश॥०॥

भैरव नाथ छुख कॉलास वॉसी,
सोरुय जगथ छुय चोनुय स्वरूप।
चुय छुख सृष्टी पालन हारय॥
भक्ति भावु लागय शेरि पम्पोश॥०॥

ज़नमु ज़ाल नॉल्य् छुम दिम म्वकजारय,
मूखि दाता छुख चुय दयावान।
रूगु पीडायि हुंद भय कासानय॥
भक्ति भावु लागय शेरि पम्पोश॥०॥

सत करमन हुंज ब्वद दितु 'शादस',
न्यथ नेहे गटि करि शिवु पूजा।
तनु मनु युथ स्वरि ओम ततसतय॥
भक्ति भावु लागय शेरि पम्पोश॥०॥

वंदना
शिव लीला

काँलास वाँसी कासतम खॉरी,
शंकरु बोज़ म्याँन्य ज़ारीये।
पम्पोशि पादन लगयो पॉरी॥

शंकरु बोज़ म्याँन्य ज़ारीये॥०॥

नादन म्यान्यन कन चुय थाव,
लादन छम चानि दर्शनची।

चुय छुख बँखत्यन हुंद व्वपुकाँरी॥
शंकरु बोज़ म्याँन्य ज़ारीये॥०॥

बेकस आमुत छुस बजि आशे,
गाशे पनुनि सूत्य अनतम गाश।
मारु बो कौरमुत छुस समसॉरी॥
शंकरु बोज़ म्याँन्य ज़ारीये॥०॥

न्यरआशन हुंज़ आश छुख चुय,
गाशि रँस्यत्यन हुंद गाश छुख चुय।
प्रकाशि चानि सूत्य च़लि अन्धकाँरी॥
शंकरु बोज़ म्याँन्य ज़ारीये॥०॥

दकु ज़द आसय लारान लारान,
वतु चानि छारान गोम यँचकाल।
वनि यितु लोसम मनि प्रॉर्य प्रॉर्री॥
शंकरु बोज़ म्याँन्य ज़ारीये॥०॥

वंदना
कृष्ण लीला

डेडि तल छुस करान नालु फँर्ययाद,
अथुरोट करतम रँट्यमय पाद।
दास छुस वालतम पापुन्य बाँरी॥
शंकरु बोज़ म्याँन्य ज़ारीये॥०॥

सनम्वख 'शादस' दर्शुन हाव,
छस आवलुन्यसुय यीरान नाव।
मटि छुय तार दिस ही जटादाँरी॥
शंकरु बोज़ म्याँन्य ज़ारीये॥०॥

कृष्ण लीला

गोसु त्राव कोसमन मालु करयो,
सालु यितु नन्दुलालु प्यालु बरयो।
मनि फँल्य् पनुनी तनि जरयो॥
सालु यितु नन्दुलालु प्यालु बरयो॥०॥
म्वरली शब्दन मन क़ेशान,
च़रनन चाँन्यन वंदयो जान।
सारु दिम बवुसरु तारु तरयो॥
सालु यितु नन्दुलालु प्यालु बरयो॥०॥

अंतःकरनन मंज़ कर वास,
ततसत प्रकाशे अनिगोट कास।
गरि गरि गिरदर, नाव सरयो॥
सालु यितु नन्दुलालु प्यालु बरयो॥०॥

वंदना

आमन तु खासन प्रेयमुक बाव,
कृष्ण दर्शणसुय त्रुजगथ आव।
अदु कति दूरयर बु ति ज़रयो॥
सालु यितु नन्दुलालु प्यालु बरयो॥०॥

म्वरछलु करनस नारद व्यास,
गन्दर सीवायि, पछ विश्वास।
दिप्तिमानु जानानु द्यान दरयो॥

सालु यितु नन्दुलालु प्यालु बरयो॥०॥

चानि बॅखती मंज़ आतम ज्ञान,
'शादस' शाँती दितु वरदान।
श्वद मनु लीला चॉन्य् परयो॥
सालु यितु नन्दुलालु प्यालु बरयो॥०॥

कृष्ण लीला

हर हर गिरदर यनु परज़ुनोवुम,
ख्वनि ललनोवुम शामु स्वंदर।
मनुसरु पम्पोश ज़न फ्वलरोवुम॥
ख्वनि ललनोवुम शामु स्वंदर॥०॥

दीवकीनन्दन ज्वसदा कुन्दन,
गोकल मोहन ज़न्मस आव।
म्वनि मीठ्य कॅर्यमस द्वददामु चोवुम॥
ख्वनि ललनोवुम शामु स्वंदर॥०॥

वंदना

ख्वनि ग्वडनुय हुंद शोन्य शोन्य बूजुम,
स्वनु कनुदूरन मारान ग्राय।
बनसी वादन रस वुज़नोवुम॥
ख्वनि ललनोवुम शामु स्वंदर॥०॥

ब्रज भूमी हुंद व्वलसुन तोशुन,
गूपी कृष्ण आव गिन्दने रास।
स्वखुसॉव्य् मन गोम द्वख मॅशरोवुम॥
ख्वनि ललनोवुम शामु स्वंदर॥०॥

अमर्यथ वॉनी बॅखती रस चोम,
शक्ती कौरनम मोहित मन।
कृष्ण कथाये कन यैलि थोवुम॥
ख्वनि ललनोवुम शामु स्वंदर॥०॥

दारिका दीशुक ध्याना दोरुम,
आनन्द अवसथायि अनुबव गोम।
भयि च़ोल दयि सुंद दर्शुन प्रोवुम॥
ख्वनि ललनोवुम शामु स्वंदर॥०॥

तप तीज़ नपुनपु वरदान ज़ीवन,
कायायि करमस नौव न्यरमान।
बख गोम बेदार रख बदलोवुम॥
ख्वनि ललनोवुम शामु स्वंदर॥०॥

लय दिच़ 'शादन' आरादनाये,
शामु रूप कामुदीव जय जय कार।
पादि प्रणामस सर नौमरोवुम॥
ख्वनि ललनोवुम शामु स्वंदर॥०॥

वंदना
कृष्ण जनुम

शामु रुपु लगुयो छाये लोलो,
राधायि छमा चॉन्ग् माये लोलो।
कामुदीवु चानि लीलाये लोलो॥
राधायि छमा चॉन्ग् माये लोलो॥०॥

कनसुनि जेलु मंजु जनुमस आख,
गट्टु चंज जगतस सिर्ययि नोन द्राख।
बाकि वौद चानि माताये लोलो॥
राधायि छमा चॉन्ग् माये लोलो॥०॥

ज्यव आँयी वोनुथ मॉलिस कुन,
वातुनावुम मै जल नंदु गोर्युन।
गूर्यबायि कूर तति जाये लोलो॥
राधायि छमा चॉन्ग् माये लोलो॥०॥

मंजलिस मंज तुलुख वासुदीवन,
नेंदुर पैयि सार्यनुय डीड्यवानन।
जेलु बर मुचरंनु आये लोलो॥
राधायि छमा चॉन्ग् माये लोलो॥०॥

जेलस पानय बर दिनु आये,
वातुनोवनख तंम्य् प्यठ जमनाये।
पाद चॉन्ग् लंग्य जमनाये लोलो॥
राधायि छमा चॉन्ग् माये लोलो॥०॥

वंदना

पोन्य छेयोन तारस तोरनख अपोर,
रातसुय मंज वातुनोवनख तोर।
ल्वलि ललवुख ज्योसदाये लोलो॥
राधायि छमा चॉन्ग् माये लोलो॥०॥

हॅल्य बानु स्योद गॅय चाने यिनय,
स्वनुसंजु लबु गॅयि हेरि तय ब्वनय।
छॅर्य बानु बरनय आये लोलो॥
राधायि छमा चॉन्ग् माये लोलो॥०॥

म्वरली बूजुम ह्येस होश रोवुम,
चैय पतु द्रायस सोरुय मै त्रोवुम।
गूपियि लारान आये लोलो॥
राधायि छमा चॉन्ग् माये लोलो॥०॥

नाद बोज 'शाद' छुय करान वीलुजॉरी,
गोपालु गिरदॅरु कृष्ण मुरॉरी।
शाखतिनाथु भॅखति भावनाये लोलो॥
राधायि छमा चॉन्ग् माये लोलो॥०॥

वंदना
कृष्ण लीला

दीवकी मातायि जय जय कार,
कृष्णु भगवानन दोर अवतार।
भगवत माया अपरमपार॥

कृष्णु भगवानन दोर अवतार॥०॥

बालक अवसतायि मंजु भगवान,
सिर्ययि अनहारस म्वखतु ज़ोतान।
गाश आव ज़गतस च़ोल अन्धकार॥
कृष्णु भगवानन दोर अवतार॥०॥

कनसन येलि बूज़ काल म्योन ज़ाव,
सिंगासनु प्यठु लायिनु आव।
दरबारस वोथ हा हा कार॥

कृष्णु भगवानन दोर अवतार॥०॥

मुह मायायि ओस वोल्मुत नाल,
नन्दु लाल डींशिथ काँप्योव काल।
छ़यतुँ गव व्यतुँ गव नरकुन नार
कृष्णु भगवानन दोर अवतार॥०॥

आकाश बुतराथ गाह मारान,
दीवी तु दिवता आयि लारान।
मूखि दाता आव मुर्लीदार॥

कृष्णु भगवानन दोर अवतार॥०॥

बालु गूपालन त्रोव परतव,

वंदना
छ्वन्य छ्वन्य र्वनि ज़ाँपानस गव।
नपु नपु च़द्रम सिर्ययि अनहार॥
कृष्णु भगवानन दोर अवतार॥०॥

दामानु दारिथ आमुत 'शाद',
मुर्ली मनोहर बोज़ फ़र्ययाद।
व्यनती बोज़तम छुस व्वमेदवार॥
कृष्णु भगवानन दोर अवतार॥०॥

ही राधे शाम

बेरिथ बावु आमुत क़रिथ छुस प्रनाम,
च़ु गोविन्दु गूपालु ही राधे शाम।
प्रभू शिव सरूपी च़ु रागव च़ु राम॥
च़ु गोविन्दु गूपालु ही राधे शाम॥०॥

येती रोज़ु वापस ति फ़ेरय नु ज़ांह,
छ़ोरुय च़ानि दरबारु नेरय नु ज़ांह।
मे प्रारुन पेयिन सार्यसुय वाँसिताम॥
च़ु गोविन्दु गूपालु ही राधे शाम॥०॥

करय ध्यान चोनुय तु लीला परय,
मनस मंजु बसॉविथ बु पूज़ा करय।
तँती दारिका छम तँती नन्दु गाम॥
च़ु गोविन्दु गूपालु ही राधे शाम॥०॥

वंदना

बु छुस बेखबर, केह सतुच छमनु ज्ञान,
न विध्या पुरानुच न छुम वीदु ग्यान।

दिहिक्य खानु खॉली व्वन्दुक्य बानु खाम॥

चु गोविन्दु गूपालु ही राधे शाम॥०॥

चे अवतार दोरुथ चु साकार छुख,

प्रभू सारि जगतुक चु आधार छुख।

य्वगन हुन्ज चु शखती चु गर्दिश विराम॥

चु गोविन्दु गूपालु ही राधे शाम॥०॥

शरण यिम यिनय तिम करन प्रापती,

परन भागवत नन्दु नन्दन विदी।

बुधी, मन, संस्कार, शक्ती त्रिनाम॥

चु गोविन्दु गूपालु ही राधे शाम॥०॥

दया कर बरसतल छु लाचार 'शाद',

दितम कर्मु हीनस मै ग्यानुक प्रसाद।

स्वखस ऑरचर छुम म्वखस पाहिमाम॥

चु गोविन्दु गूपालु ही राधे शाम॥०॥

वंदना

माता रॉज्ञन्या

माता रॉज्ञन्या असि करतु साये,

बजि आशाये आये योर।

पम्पोशि पादन तल दितु जाये॥

बजि आशाये आये योर॥०॥

पानु छख बीना हाल वुछ सोनुय,

अथु रोट चोनुय असि दरकार।

येमि संकटु कर म्वकलन पाये॥

बजि आशाये आये योर॥०॥

वनवॉस्य् सफरस ह्यनु छी आमुत्य,

छेनु छय गॉमुच असि जेनु जाय।

सरि राह परु छेन्यु गॅरि यनु द्राये॥

बजि आशाये आये योर॥०॥

व्यन्ती कन थाव चारु कर सोनुय,

मारु गॉमुत्य् ओश हारन कूत।

संतान फॅर्ययॉद्य आय माताये॥

बजि आशाये आये योर॥०॥

गरि गरि रोट असि चोनुय दामन,

वंदनायि चाने महिमा जोन।

द्वछि द्वछि लॉगी पोश पूजाये॥

बजि आशाये आये योर॥०॥

वंदना

दकुजद आमृत्य् लारान लारान,
अथु दोरिथ छी प्रारान च़ेय।
छ्वकुलद आलव क़्यजि नु ज़ाये॥
बजि आशाये आये योर॥०॥

दाता च़ुय छख च़ुय व्वपुकोरी,
च़ुय ज़गत अम्बा च़ुय भवौनी।
परि पूर्ण कर मनु कामनाये॥
बजि आशाये आये योर॥०॥

‘शादस’ सथ छम दादस वातख,
असुवुनि म्वखु यिख आशिरवाद।
राजि रैन्य असि रछ माजि ममताये॥
बजि आशाये आये योर॥०॥

माँज छेना

रछि ममता हावि माँज छेना।
वछि अमर्यथ चावि माँज छेना॥
रॉग्यन्यायि तन मन कोर अर्पण।
संतान गँज़रावि माँज छेना॥
बालु पँत्य् आरुकँत्य् गारान छिस।
आलुवन कन थावि माँज छेना॥
बुथि आव संकट वति गँय गीर।
गुथि गंड मुच़रावि माँज छेना॥

वंदना

छँकरुनु आमृत्य छि तरफातन।
छाँडि तु सोम्बरावि माँज छेना॥
तस निशि वातव औश हारान।
असुनावि गिंदनावि माँज छेना॥
गरि छिस द्रामृत्य् करि कल्याण।
परु मा ज़ांह पावि माँज छेना॥
गटि मंज स्वय करि म्वकलन पाय।
तप तीज दरशावि माँज छेना॥
अँदरून हावोस सीनु खँनिथ।
ज़खमन बँलरावि माँज छेना॥
यैलि ज़ाँह बुथ फिरि अँस्य् रोशोस।
अथु डालि मनुनावि माँज छेना॥
अंतःकरनन मंज रोछ बाव।
व्यतरावि प्यतरावि माँज छेना॥
‘शादु’ अतुर ते आसि गोमुत।
बखशि तु मनसावि माँज छेना॥

वंदना
दीवी आराधना

माता पनुनुय गँजरावतम,
येमि संकटु मंजु म्वकलावतम।
आँदीन आसय आशा छम॥
येमि संकटु मंजु म्वकलावतम॥०॥
जीवन दाता पालन हार,
माता दयालू बखशनहार।
चुय दूर नजरन चुय हमदम॥
येमि संकटु मंजु म्वकलावतम॥०॥
अँदुय अँदुय शौहलथ बोनि शौहजार,
मंजु बाग स्वंदर दीवी दार।
प्रकरम सरगम जीरोबम॥
येमि संकटु मंजु म्वकलावतम॥०॥
द्वखु समसारन कोरनस गीर,
दामानु रोटमय कर तदबीर।
बारगाहि चाने क्या गछि कम॥
येमि संकटु मंजु म्वकलावतम॥०॥
दान चुय करतम ज्ञानुक गाश,
दर्मुक कर्मुक यियिह्यम बाश।
सनम्वख बासतम कासतम गम॥
येमि संकटु मंजु म्वकलावतम॥०॥

वंदना
वॉरॉग्य 'शादस' गोमुत मन,
आरादनाये थावतम कन।
बेबस बरतल सर छुम खम॥
येमि संकटु मंजु म्वकलावतम॥०॥

माता असि वन

चै माता क्याजि दोरुथ मोन असि वन।
सितम संकट कोताँ चालोन असि वन॥
जुवस जोगुख बिलाशक पेंड पुरन त्रॉव।
बंदन जन्मुक किथय त्रावोन असि वन॥
तुफानस मंजु छि नमु रोस नाव यीरान।
वथा हाव युथ बँठिस लागोन असि वन॥
कोरुय मन प्राण अर्पन आलवुय पान।
द्वहय रोट चीरु दामन चोन असि वन॥
जरान किथु कँन्य चु छख सॉन्य आहो जॉरी।
करुन छुय चारु जल जल सोन असि वन॥

वंदना

असे सॅर्य प्यह्य छु व्वन्य् सॅहलाब गोमुत।
सहायक कुस च़े रौस ज़ानोन असि वन॥

कोताम 'शादुन्य' सदा सॅहरॉव्य् सपदन।
अलेंदुय आत्मा थावोन असि वन॥

आलव

तुलमुलि कॅर्यतव मातायि ज़ॉरी,
स्वय छव परमु हितुकार्ये।

स्वय सरवु शखती, सरवु आदॉरी॥

स्वय छव परमु हितुकार्ये॥०॥

पम्पोश लागोस भॅखति भावनाये,

लोलु तु माये पूज़ोस पाद।

द्वख दॉद्य पनुनी बावोस सॉरी॥

स्वय छव परमु हितुकार्ये॥०॥

तन तन नॉविथ अबिमान त्रॉविथ,

द्वद कंद बॉविथ दॉरिव ध्यान।

फिज़हस मंज़ ग्रेज़ि जय जय कॉरी॥

स्वय छव परमु हितुकार्ये॥०॥

रतुन दुप ज़ॉलिथ दुपु मुशकॉविथ,

मनु किन्य् मॅग्यतोस गटि मंज़ गाश।

पाप शाप माफ करि बखशनहॉरी॥

स्वय छव परमु हितुकार्ये॥०॥

वंदना

मनु कामनायन स्वय करि पूरन,
बॅखत्यन पनुन्यन दियि शोहजार।

माजि हुंज़ ममता असि गछि जॉरी॥

स्वय छव परमु हितुकार्ये॥०॥

आलवस आलव मिलुनोव 'शादन',

अद लोग आदन यादन फियुर।

स्वनहॉर्य सोपनस बनि साकार्ये॥

स्वय छव परमु हितुकार्ये॥०॥

श्रद्धायि पोश

हाल दिलकुय मॉज अज़ बु बावय,

इयकु त्रावय पादन तल।

सीनु छ्वकुलद द्वखु ज़द हावय॥

इयकु त्रावय पादन तल॥०॥

न्यथ पूज़ा चॉनी करुहा,

व्रथ चोनुय ऑठम दरुहा।

मनु स्वरुहॉ ख्यनु ख्यनु नावय॥

इयकु त्रावय पादन तल॥०॥

सुह सवॉरी छख छत्रु दॉरी,

सर्वु व्यापक सर्वु अधिकॉरी।

अँतरि आसनस नेथुरु वथरावय॥

इयकु त्रावय पादन तल॥०॥

वंदना

श्रदायि हृंद्य रुतन दीप जालय,
नॉल्य् त्रावय पम्पोशि मालय।
दुपु कोफूरु वतु मुशकावय॥
इयकु त्रावय पादन तल॥०॥

न्यरबल छुस कल छम चॉनी,
करतु अथु रोट माता भवॉनी।
दिम मै शखती छुम बॅखति बावय॥
इयकु त्रावय पादन तल॥०॥

चॉन्य सुमरण शाँती छे 'शादस',
चुय सहायक ज़नमु ज़नमातस।
ह्यथ यि लीला न्यथ च्यतस पावय॥
इयकु त्रावय पादन तल॥०॥

व्यनु पोश लागय

छॉरिथ अँनिम बठि बेरि मॉजी,
व्यनु पोश लागय शेरि मॉजी।
चॉर्य चॉर्य चाने वेरि मॉजी॥
व्यनु पोश लागय शेरि मॉजी॥०॥

तुलमुल्य् नागस करय प्रकरम,
मायि सान आसय सायि करतम।
अख कदम अज़ न्यबर नेरि मॉजी॥
व्यनु पोश लागय शेरि मॉजी॥०॥

वंदना

द्वद, कंद, नाबद भावु बावय,
आँगनस मंज़ बाग डेरु त्रावय।
ऑरत्य्न् डेरु डेरु फेरि मॉजी॥
व्यनु पोश लागय शेरि मॉजी॥०॥

चानि भावनायि आस ननुवोरुय,
पान पुशरोवुय ध्यान दोरुय।
ह्यस दिम खसु चानि हेरि मॉजी॥
व्यनु पोश लागय शेरि मॉजी॥०॥

मनशि मोर चोवुम मायायि मस,
लूबु नैन्दरा छम ज्ञानु हीनस।
वुज़नावतम अकि जेरि मॉजी॥
व्यनु पोश लागय शेरि मॉजी॥०॥

चुय रॉग्यन्या छख चुय शारिका,
चुय सरस्वती छख चुय अंबिका।
ह्योर खार पापुनि क्रेरि मॉजी॥
व्यनु पोश लागय शेरि मॉजी॥०॥

परमु शक्ती छख ही भवॉनी,
पानु छख यूगिनी पानु ज्ञॉनी।
करमु बोग 'शादस' शेरि मॉजी॥
व्यनु पोश लागय शेरि मॉजी॥०॥

वंदना
व्यनती

भवौनी अख नजर कर्मच मै करतम !
गदा आलव दिवान छुस बर मुचरतम !!

अतुर गव कतरि गँजराँविथ कँडिम द्वह !
बितुर दिम ब्रहमु ग्यानय जूल्य् बरतम !!

खता कारस अता कर राहनुमॉई !
बखुशतम पॉपियस अपराध हरतम !!

बिहिथ तखतस करान सखतस सहल छख !
चै आसुन छुय मै दासन मंज गँजुरतम !!
दितम वॉनी सफल गछि जिन्दुगॉनी !
चु कुनि विजि कलपनाये मंज मै सरतम !!

गन्योमुत चानि बजरुक बाव 'शादस' !
दया करतम मनस आकार गरतम !!

वंदना
जीठयॉर जिष्टा

ताजदार माजि हुंद राजि दर्बीर,
जीठयॉर जिष्टायि जय जय कार।
जरबॉफ्य वर्दन हटि म्वखतु हार॥
जीठयॉर जिष्टायि जय जय कार॥०॥

शानु बजि पानु रँट थजरस जाय।
लोलु वॉल्य् छिस करान ल्वलुमतु लाय।
शूबिदार लूबुवुन्य् शेरस सवार॥
जीठयॉर जिष्टायि जय जय कार॥०॥

द्रष्टी चॉनी छि शन तरफन,
पृथ्वी आकाश चैय अर्पन।
त्रन बवनन प्यठ छुय आदिकार॥
जीठयॉर जिष्टायि जय जय कार॥०॥

बुबरायि अमर्यथ नाग वुजान,
मखमॅल्य् आंगुन शायानि शान।
ऑंद पौख शीतल बोनि शौहजार॥
जीठयॉर जिष्टायि जय जय कार॥०॥

दास छी पूजायि लागान प्राण,
दुपु कोफूर वतु मुशकावान।
दीवी दर्शुन साकशातकार॥
जीठयॉर जिष्टायि जय जय कार॥०॥

वंदना

छ्यनु गौमत्यन हुंद यी नय आर,
सँदरुकि आवलेनि दितु व्वन्य तार।
फीरिथ दहि वुहूर्य यियि दशहार॥
जीठयॉर जिष्टायि जय जय कार॥०॥

माता अकि लटि करतन याद,
बावु पम्पोश ह्यथ वाती 'शाद'।
खुर छुम कारन दितु व्यस्तार॥
जीठयॉर जिष्टायि जय जय कार॥०॥

शारिका माता

शारिका माता छुम नय करार,
चानि अनुग्रेहकुय छुम इन्तिजार।
बजि आशायि चास चोन दर्बार॥
चानि अनुग्रेहकुय छुम इन्तिजार॥०॥
वरदार म्योनुय अजलय लोन,
खुर कासि कर्मस वर्दान चोन।
इयकुचे रुखु शेर छुय यखतियार॥
चानि अनुग्रेहकुय छुम इन्तिजार॥०॥
अथु दौरिथ छुस व्यनती छम,
अज्ञानु गटि मंज म्वकलावतम।
सतकर्मन कर वथ आशकार॥
चानि अनुग्रेहकुय छुम इन्तिजार॥०॥

वंदना

मोह गोम गौलिब च्युह च्युह द्राम,
द्वह गोम लूसिथ सपदुम शाम।
गोब छुम गोमुत मायायि बार॥
चानि अनुग्रेहकुय छुम इन्तिजार॥०॥

पजि लोलु कोरमय गनटायि ठस,
दिह कायायि बर बँखती रस।
वुजनाव मनची सर्गम तार॥
चानि अनुग्रेहकुय छुम इन्तिजार॥०॥

चैय कुन पकनस आयम नु वथ,
छोर बानु मोर छुम यिमु क्या ह्यथ।
प्राटान रूदुस बँल्य छंबछार॥
चानि अनुग्रेहकुय छुम इन्तिजार॥०॥

अथु छोन मन्दुछोस यी छुय सथ,
पछि पोश अँन्यमय हलमस क्यथ।
वन्दना करनस दिम आदिकार॥
चानि अनुग्रेहकुय छुम इन्तिजार॥०॥

न कँरुम पूजा न कोरुम ध्यान,
दीवी आसय पुशरुनि पान।
हँल्य कँल्य शब्दन माने चार॥
चानि अनुग्रेहकुय छुम इन्तिजार॥०॥

'शादन' डींशिथ ठँहरोव ख्वर,
प्रंग चोन पर्वत चक्रीश्वर।
पम्पोश आसन दर्शन दार॥
चानि अनुग्रेहकुय छुम इन्तिजार॥०॥

वंदना
आराधना

दर्शनुक छुम मै शर, मॉजी मुच़राव बर।
रायि आस सायि कर, मॉजी मुच़राव बर॥
बॅखुत्य छुसय प्रारान, ओश बु छुसय हारान।
च़ुय मै छिहम यावर, मॉजी मुच़राव बर॥
चोनुय बु सन्तान, माता रोज़ुम मैहरबान।
सहायतुच अख नज़र, मॉजी मुच़राव बर॥
बोज़ छुसय गुल्य गंडान, पूज़ि लागय बु प्राण।
थयकु बु चोनुय बजर, मॉजी मुच़राव बर॥
आसन बु शेरय, अँदय् अँदय् बु फेरय।
मनु मन्दरस अन्दर, मॉजी मुच़राव बर॥
न्यथ बु करय पूज़ चॉन्य, सथ मै करुम ही भवॉन्य।
छुस बु प्योमुत पथर, मॉजी मुच़राव बर॥
चॉनी मै आश छम, अथु रोट च़ु करतम।
दास पनुनुय गँज़र, मॉजी मुच़राव बर॥
दिल फुटिथ युस ति आव, ज़ांह नय खॉली सु द्राव।
छख दया सर बु सर, मॉजी मुच़राव बर॥
“शादस” छे चॉन्य कल, अज़ हय वोतुय डेडि तल।
अख कदम कड न्यबर, मॉजी मुच़राव बर॥

वंदना
मॉज

वछि वुशनेरस अमर्यथ चावान,
मॉज छि आँखुर मॉजी आसान।
हो हो कॅर्य कॅर्य क्वछि ललुनावान॥
मॉज छि आँखुर मॉजी आसान॥०॥
कथु हेँछनावान पतु पतु फेरान,
अँन्दुरिमि चुकि सान शेरान पॉरान।
चॅर हॉर हॉविथ छॅल्य बॅल्य ख्यावान॥
मॉज छि आँखुर मॉजी आसान॥०॥
जैवि प्यठ आसान रतु छेपि लगुयो,
ज़ूव जान वन्दुयो बलायि लगुयो।
रुमु रुमु सॉरिथ गुमु शेहलावान॥
मॉज छि आँखुर मॉजी आसान॥०॥
वाँलिंजि वस ताम आयुत थावान,
ओंगलव ओंगलव कद छस मेनान।
नरि शांद थॉविथ लरि पान सावान॥
मॉज छि आँखुर मॉजी आसान॥०॥
पॅज्य पॉट्य बोंबुरुन गुँ छेनु च़ालान,
अवलादस पथ जुव जान गालान।
तस छनु अँछ प्यठ मँछ ज़ुरुनावान॥
मॉज छि आँखुर मॉजी आसान॥०॥

वंदना

थलि थलि डेशान छायेन तु ग्रायन,
कति कति फिरवान शोहल्यन तु सायन।
अथु थोद तुल्य् तुल्य् रुत रुत कांछान ॥
माँज छि आँखुर माँजी आसान ॥० ॥

माँज छि दीवी ममता सागर, पादन तल छिस स्वर्गक्य् आगर।
दँयि दीव जन्मुक भय छुय कासान, माँज छि आँखुर माँजी आसान ॥० ॥
अँहसान अँम्यसुंद यिनु मँशरावख, यिनु ज़ाँह अँम्यसुंद दिल फुटरावख।
यि छेना ल्वकटिस बोड वातनावान ॥ माँज छि आँखुर माँजी आसान ॥० ॥

माजि कर आदर 'शाद' च़ु रोज़ख,
द्वख च़लुनय आबाद च़ु रोज़ख।
वाँसि छय अँम्य सुंज आँही पोशान ॥
माँज छि आँखुर माँजी आसान ॥० ॥

साँई श्रद्धा

महिमा ज़ॉनिव साँई श्रद्धाये,
सुय करि पाये सोन।
मनु मंदरस मंज कँर्यतोस जाये ॥
सुय करि पाये सोन ॥० ॥

व्वन्दु किस आँनस मल गछि कासुन,
बासुन गछि साकार।
मनुबाव कामना तति छेनु छाये ॥
सुय करि पाये सोन ॥० ॥

वंदना

साँई सुमरन आनन्द दायक,
पापव निशि म्वकजार।
क्रीठिस सफरस शीतल साये ॥
सुय करि पाये सोन ॥० ॥

साँई नावुक रस बर प्यालन,
मस च्यथ मँस्यती प्राव।
अमर्यथ दारा मंग गंगाये ॥
सुय करि पाये सोन ॥० ॥

अष्टु सैदी यस तॉबीन आसी,
तस नाव यूगीश्वर।
श्वद्ध आत्माहस श्वद कायाये ॥
सुय करि पाये सोन ॥० ॥

सुय सर्वु व्यापी सुय द्वखुहॉरी,
जगतन हुंद आदार।
येम्य सुंद अनुग्रेह जगतस प्रजाये ॥
सुय करि पाये सोन ॥० ॥

कथ बूज 'शादन' कथ वातनॉवुन,
सत गव सुय ओंकार।
अथु दॉरिथ छुय पजि बावनाये ॥
सुय करि पाये सोन ॥० ॥

वंदना
साँई राम

पजि मनु पॅर्यतव कॅर्यतव जॅरी,
साँरी वॅन्युतव साँई राम।

सुय करि अनुग्रेह सुय करि यॅरी॥

साँरी वॅन्युतव साँई राम॥०॥

सतग्वर स्वॉमी अंतरयाँमी,

शिरडी बाबा साँई नाथ।

गदि प्यठ शूबान सुय अदिकाँरी॥

साँरी वॅन्युतव साँई राम॥०॥

बॅखती टॅरय छिव जगत्कुय बंदन,

शवद बावनाये दॅरिव ध्यान।

साँई सुमरन कष्टु निवाँरी॥

साँरी वॅन्युतव साँई राम॥०॥

समद्रष्टी हुंद मस बाँगरावान,

तस निश ब्योन छुनु कृष्ण कॅरीम।

नादार लाचार कांह नर नाँरी॥

साँरी वॅन्युतव साँई राम॥०॥

अम्बर न्यरमल धरती शीतल,

साँई लीला स्वखु सागर।

खसुवुनि सिर्ययुक प्रागाश जाँरी॥

साँरी वॅन्युतव साँई राम॥०॥

वंदना

साँई सादक लीन व्वपासक,
ल्वलि मंज ललुवान स्वखु संदेश।

शिव परशोतम कृष्ण मुराँरी॥

साँरी वॅन्युतव साँई राम॥०॥

दारिका माई श्रद्धा सबूरी,

साँई रसुकी नाग वुजान।

प्रेमुच गंगा अमर्यथ दाँरी॥

साँरी वॅन्युतव साँई राम॥०॥

बाबा नम रठ नावे 'शादस',

दाता दितु यथ सॅदरस तार।

पाँपी छुस, छुख बखशनहॉरी॥

साँरी वॅन्युतव साँई राम॥०॥

साँई रस

प्रवु छॅकरावान खोत अफताबा,

शिरडी बाबा साँई नाथ।

बागि आव बागस ताजु ग्वलाबा॥

शिरडी बाबा साँई नाथ॥०॥

भारत भूमी गॅयि आबाँरी,

कष्टु न्यवाँरी ज़नमस आव।

साकार सपद्योव ख्वशवुन खाबा॥

शिरडी बाबा साँई नाथ॥०॥

दीन दुखी आय लारान लारान,
येछि पछि कोरहस पादि प्रणाम।
स्वखुमय तन गॅयि मन शादाबा॥
शिरडी बाबा साँई नाथ॥०॥

अंतर तति छुनु कृष्ण कॅरीमस,
ब्योन छुनु ज्ञानान राम रहीम।
गीता फुरकान कुनुय हिसाबा॥
शिरडी बाबा साँई नाथ॥०॥

बावुक बल छुय प्रेमुक बंदन,
स्वखु शाँती हुंद सुय आदार।
'सब का मालिक एक' जवाबा॥
शिरडी बाबा साँई नाथ॥०॥

सत गव सतुची वथ वनि थावुन्यु,
ध्यानस मंज बनि ज्ञानुच ज्ञान।
श्रद्धा सुमरन ताबस लाबा॥
शिरडी बाबा साँई नाथ॥०॥

बावना शक्ती बखशुम 'शादस',
प्रॅयमु संगीतुक चावुम रस।
साँई लीला मॅसती शराबा॥
शिरडी बाबा साँई नाथ॥०॥

ही गोरू साँई बाबा

बॅखतिस बोज़तम सदा, ही गोरू साँई बाबा !
स्यद करतु मनि कामना, ही गोरू साँई बाबा !
नावु सुमरण छुस करान, चॉन्यु लीला छुस परान !
रुम रुम करान वन्दुना, ही गोरू साँई बाबा !
द्वख हर कर व्वपुकार, आवलुनि लागि हे तार !
बखशुम सॉरी खता, ही गोरू साँई बाबा !
छुस बु पॉपी अंज्ञान, चोन दर्शुण छु वर्दान !
स्वय छि पोशिवुन्यु संपदा, ही गोरू साँई बाबा !
बरतल छुस शर्मसार, चोन अनुग्रेह छुम बकार !
छुस हलम दॉरिथ गदा, ही गोरू साँई बाबा !
शिरडी चोन असथान, शर्नीगथ छु केशान !
श्वद करतु म्यॉन्यु वासना, ही गोरू साँई बाबा !
युस करान चोनुय ध्यान, तस दपान छुख चु टोठान!
रूगन छुख करान शफा, ही गोरू साँई बाबा !
'शादस' छुय बखति बाव, अख दया दृष्टी त्राव !
कषटस अन्दर सहायता, ही गोरू साँई बाबा !

वंदना
साई सुमरण

मनु कर पूजा भावनायि सान,

साई सुमरण साई ध्यान।

प्रेयमुक बन्दन गीता ज्ञान॥

साई सुमरण साई ध्यान॥०॥

क्षण क्षण स्वरतन बरतस लोल,

व्यन्ती बोझी शिरडी वोल।

सत शबदन मंज नैथ ग्वनु गान॥

साई सुमरण साई ध्यान॥०॥

स्वखु दाता छुय तैम्य सुन्द नाव,

द्वख हरता रसुदार प्रभाव।

रंग छोटि जीवन मँग वरदान॥

साई सुमरण साई ध्यान॥०॥

सदबाव संदेश येम्यवातु नोव,

सम दृष्टी हुंद मस येम्य चोव।

नेशकाम भक्तयन ग्यान प्रदान॥

साई सुमरण साई ध्यान॥०॥

सुय समसारुक आधारुबूत,

सुय सर्व व्योपी साक्षात यूत।

पानय मुक्ती ग्यान प्रमान॥

साई सुमरण साई ध्यान॥०॥

वंदना

नफसि अमारस मौरिथ ह्योक,

ब्रह्म सोरूपस दौरिथ ह्योक।

येम्य कोर जगतुक शोद नैरमान॥

साई सुमरण साई ध्यान॥०॥

सत धर्मुक दितु 'शादस' बाश,

वतु हावुक छुख सिर्ययि प्रकाश।

साई कीर्तन विधी विदान॥

साई सुमरण साई ध्यान॥०॥

साई बाबा

छँतुर छाया करखना साई बाबा !

प्रखुट दर्शन चु दिखना साई बाबा !!

गमन मंज गीर छुस तदबीर करतम !

अनाथस द्वख हरखना साई बाबा !!

सरल शीतल छे अमर्यथ चॉन्य् वॉनी !

छर्यन खास्यन बरखना साई बाबा !!

श्रद्धा बपूर छम पोज़ कोल तु ज़ोर छुस!

इयकस म्याँनिस परखना साई बाबा !!

वंदना

जनुम दोरुम तु कर्मन हुंज हवनर दिम !
मनस मूरथ गरखना साँई बाबा !!

नजर कर पथ क्वहन बालन प्योमुत 'शाद'!
खबर ह्यखना तरखना साँई बाबा !!

बाबा

बब छुख बाबा छी वनान नाव,
साँई संकट मंजु म्वकलाव।

यिरवुन्य नाव सॉन्य् बोठ वातनाव॥

साँई संकट मंजु म्वकलाव॥०॥

शक्तिमान स्वामी यूगीश्वर,
सत गवर सत्यवाँदी मनोहर।
कांह छुनु ज्ञानान कति प्यठु आव॥
साँई संकट मंजु म्वकलाव॥०॥

चुय शरण दाता शीतल छा़य,

चुय करान अनाथन त्वलु मतुलाय।

चुय करान ग्यानु अमर्यतु छिरकाव॥

साँई संकट मंजु म्वकलाव॥०॥

चुय बैसिथ छुख शिव रूपस अन्दर,
चुय परशूतम चुय हँरीहर।
चुय छुख न्यरमल दया दैर्ययाव॥
साँई संकट मंजु म्वकलाव॥०॥

वंदना

साधना चाँनी करव बरपूर,
दुश कर्मव निश थाव असि दूर।

अन्तः कर्णन नैशकाम बाव॥

साँई संकट मंजु म्वकलाव॥०॥

'शादुन' वाँत्यनय च़ेय नमस्कार,
आशवीदुक दिम अदिकार।
शर्णीगथ छुस दर्शुन हाव॥
साँई संकट मंजु म्वकलाव॥०॥

साँई नाथ

छुस बु पाँपी पर्दु करतम साँई नाथ !
डेडि तल छुस बर मुचरतम साँई नाथ !!

रावु राँविम द्वह पशेमान छुस तवय !
अज तु गव पगहुच फिकिर छम साँई नाथ !!

दारि मुचराव्यम नु सोंचस वशफु गव !
बारि खॉरिम फिकिरु तय गम साँई नाथ !!

बे वँसीलन करतु अख कर्मच नजर !
छुम अथस क्यथ चोन परचम साँई नाथ !!

वंदना

पँदय छेनिम पँक्य पँक्य मगर हॉसिल नु कँह !
म्वलवु क्या ह्यथ कतरि हलम साँई नाथ !!
अज़ छि 'शादस' नागरादस कुन नज़र !
द्यूवु फ्वलन शाठस ति कोसम साँई नाथ !!

साँई मंथन

श्री तप साँई सत सर्विकार।

जीवन सफल कर साँई सार॥

साँई मनथन करि व्वपकार।

जीवन सफल कर साँई सार॥

युस करि सुमरण द्वह तय राथ।

अनुभव सपद्यस तँम्य सुंज़ ज़ाथ॥

पज़ि मनु बँखती पोज़ व्यवहार।

जीवन सफल कर साँई सार॥

शिरडी संतस सासु बँदय नाव।

बस गछि आसुन पोज़ बँखति बाव॥

अर्पन नमसकार बारम बार।

जीवन सफल कर साँई सार॥

अनिगँट्य कोरमुत गाशस ठाख।

अज्ञानु छायि हौल वतु वॉनाख॥

शबनँम्यु शिहलिस पेडान नार।

जीवन सफल कर साँई सार॥

वंदना

दस तुल लोलस तस व्वन्दु बाव।
रचि रचि पानस कर पॉराव॥
द्वछि द्वछि पोशन कर अंबार।
जीवन सफल कर साँई सार॥

बँखत्यन हृदयस चोनुय निवास।

मनुचव चेशमव सपदान बास॥

श्वद कर वासना श्वद कर व्यचार।

जीवन सफल कर साँई सार॥

संत बाबा ! छुय बरु तल 'शाद'।

बावनायि बँर्यथुय बोज़ फँर्ययाद॥

दाता दयालू पालन हार।

जीवन सफल कर साँई सार॥

तोह्य ति ज़ॉनिव :-

(साँई नाथस छि श्रधावान भक्त्यव कम कम नाव दित्यमुँत्य।

साँई मंथन तु साँई सार ति छि तिमवुय मंज़ु।)

वंदना
साई शब्द

बाबा बॅखत्यून छय मनि कामन,
असि रोट दामन चोनूये।
ल्वलि मंज कल चॉन्य खासन आमन॥
असि रोट दामन चोनूये॥०॥

गाशी छेतु कोर वकतुक्य वावन,
बरबुकु आलव रावान गॅय।
गटि कॅर पिलवन शहरन गामन॥
असि रोट दामन चोनूये॥०॥

कॅल्य गॅय कोस्तूर्य चॅल्य तरफातन,
शबनॅम्य् शैहजार रातनरोव।
न ग्यवान बुलबुल न फ्वलान बामन॥
असि रोट दामन चोनूये॥०॥

म्वकृजारुच छेनु काँहति सॅबीला,
बस चॉन्य लीला अपॅरमपार।
साई सुमरण सुबहन शामन॥
असि रोट दामन चोनूये॥०॥

दाथुर वॅहरिथ वटनस गाँगल,
तनु यनु छेनु गव यॅदरस पन।
आछुर अबसाव वर दितु खामन॥
असि रोट दामन चोनूये॥०॥

वंदना

साई शब्दस लय कॅर 'शादन',
मनु मॅदरस मंज शीरुन जाय।
ती छुस लीखित तनि तय जामन॥
असि रोट दामन चोनूये॥०॥

भवॉनी

शकृल सीनस खॅनिम माता भवॉनी।
पनुन्य पहचान दिम माता भवॉनी॥

द्वदस सुत्य् माजि चोवुस बाव चोनुय।
शब्द शेरुन्य ह्यछिम माता भवॉनी॥

करुन्य छय रॉछ पनुन्यन बेवसीलन।
यहय मिन्नत मॅजिम माता भवॉनी॥

वुमुर सॉर्य यिमव कॅरहय समरपन।
सफर बूगान छि तिम माता भवॉनी॥

परन प्योसय खबर छम छख तर्नतार।
चरन चॉनी रॅटिम माता भवॉनी॥

कथन कन थवतु 'शादस' छुय बरसतल।
अथन क्यथ पोश छिम माता भवॉनी॥